



Mohd Ihsan bukti graduan UMP mampu urus projek di luar negara

Ternyata mahasiswa Sarjana Muda Kejuruteraan Mekanikal dari Universiti Malaysia Pahang (UMP) bukanlah sekadar melahirkan graduan yang bakal memenuhi kehendak industri negara, malah turut menghasilkan bakal jurutera yang sangat berbakat sehingga mampu menempatkan diri dalam kalangan syarikat gergasi antarabangsa. UMW Synergistic Generation merupakan sebuah syarikat antarabangsa yang mempunyai kepakaran dalam pelbagai bidang teknologi kejuruteraan dan salah satunya ialah dalam bidang *oil and gas* yang

turut menempatkan Mohd Ihsan Abd Rahim, 25 sebagai salah seorang juruteranya.

Walau baharu sahaja dua tahun menempatkan diri di dalam syarikat tersebut, namun dipertanggungjawabkan dengan projek yang agak mencabar apabila beliau ditempatkan di negara Iraq dalam mengendalikan kerja-kerja piping in Garraf Power Plant Iraq. Beliau telah dipertanggungjawabkan dalam segala kerja piping di *Power Plant* tersebut termasuklah dalam fasa kejuruteraan, penetapan spesifikasi, pemasangan dan sebagainya.

Ternyata usia setahun jagung dalam dunia pekerjaan bukanlah menjadi penghalang buat anak kelahiran Selangor ini untuk membuktikan beliau sememangnya layak dalam menguruskan projek di luar negara ini sekaligus menyandang jawatan sebagai Jurutera Mekanikal Perpaipan.

“Sangat mencabar bekerja di negara Iraq ini namun saya dapat atasinya dan menjadikan ia satu cabaran yang sangat positif kepada saya kerana dapat mempelajari selok belok dunia pekerjaan sebenar serta secara tidak langsung dapat mengenali ramai jurutera yang mempunyai kepakaran dalam bidang masing-masing,” ujar jelas anak keenam daripada sepuluh beradik ini.

Turut aktif dalam berpersatuan, Mohd Ihsan berpendapat bahawa kejayaannya ini turut didorong oleh ilmu yang diperoleh di UMP yang amat praktikal untuk diterapkan dalam dunia pekerjaan sebenar. Malah beliau

menyifatkan apabila ditempatkan di negara asing bersama-sama dengan pakar dalam bidang kejuruteraan, tidak sedikit pun beliau berasa kekok untuk menimba ilmu daripada mereka serta bersama-sama menggembeng tenaga dalam mengerjakan projek tersebut.

Sebagai bekas Presiden Persatuan Seni Silat Gayong yang turut berpeluang menjadi wakil UMP dalam menjalankan kursus kejurulatihan silat bagi L'association Francaise de Silat Seni Gayong di Lille, Perancis merupakan antara pemangkin dalam menguatkan semangat beliau dalam menempuh dunia perkerjaan di negara asing ini.

Tambahnya, UMP bukan sahaja menjanjikan ilmu kejuruteraan yang bermutu malah merupakan medan meningkatkan jati diri mahasiswa yang bakal mengisi kekosongan dunia pekerjaan kelak.

